

PanSALB E RUPELLA MMAKGOTLA A TAOLO YA DIKOLO

KA MELAO YA PUO THUTONG LE TSHEBEDISO YA TENG

Ka Kabelo Mohlomi

Kopano ena e ne e le mabapi le ho rupella ditho tsa makgotla a taolo ya dikolo ka phethahatso, ntshetsopele, tekolo le ditokelo tsa puo. Kopano e ne e memme matitjhere, mesuwelhoohe, bangodi, le batshehetsi ba dikolo ho tla inwesa ka nkgo

Ofisi ya PanSALB – Freistata e ne e etetse makgotla a dikolo tse fapaneng, sekolong se phahameng sa Marallaneng, Ficksburg ka Mantaha wa la 03 Mphalane 2022. Kopano ena e ne e le mabapi le ho rupella ditho tsa makgotla a taolo ya dikolo ka phethahatso, ntshetsopele, tekolo le ditokelo tsa puo. Kopano e ne e memme matitjhere, mesuwelhoohe, bangodi, le batshehetsi ba dikolo ho tla inwesa ka nkgo. Letsholo lena le ne le tshwerwe ke Motsamaisi wa



Kabelo Mohlomi

PanSALB Provenseng ya Freistata, Mme Nikiwe Matebula hammoho le Mosebetsi ka Puo wa PanSALB, Mme Malefu Mahloane.

Mme Malefu Mahloane o qadile puo ya hae ka ho hopotsa ba teng ka thomo ya PanSALB. O fanne ha kgutshwane ka nalane ya ho thehwa ha boto le thomo ya yona. Ho tse ding tseo a di buileng, o itse karolo ya boto ke ho nnetefatsa ntlafatso ya

maemo bakeng sa ntshetsopele le tekatekano ya dipuo tsohle tse molaong. O ekitse ka ho hlalosa hobaneng dipuo tsohle di le bohlokwa le hore hobaneng e le boikarabelo ba setjhaba.

Qetellong ya puo ya hae, o ile a bapala vidiyo e bitswang Sink or Swim e tlalehang mathata ao barutwana ba kopanang le ona ka puo eo ba rutwang ka yona dikolong tsa Afrika Borwa. Baithuti ba ne ba tletleba ka kgaello ya

bokgoni ba ho araba dipotso le ho nka karolo ka diphaposing ka lebaka la ho se utlwisisi ka ho phethahala puo eo ba rutwang ka yona.

Ditho tsa kopano di ile tsa fumana monyetla wa ho hlahisa maikutlo a tsona ka thomo ya boto le ka vidiyo. Leha ditho tse ding tsa makgotla a dikolo di ile tsa dumellana le tshebediso ya puo ya letswele bakeng sa ho ruta dithuto tsohle, ba bang ba ile ba hanyetsana ka hore lefapha le ka lahlehelwa ke nako. Motswadi e mong o ile a kgothaletsa tshebediso ya dibuka tsa kgale tse ngotsweng ka dipuo tsa letswele ho ntlafatsa tlolontswe ya motho; dibuka tse kang Ntataise e ngotsweng ke Ntate L.E.A. Thejane.

Mme Matebula o ile a tshetleha puo ya hae ya Melao ya Puo Thutong ka ho hlalosa ka botebo bohlokwa ba phethahatso, ntshetsopele, tekolo le ditokelo tsa puo dikolong. O itse dipuo tsa botjhaba tsa Afrika di ntse di qhelelwa ka thoko empa ho le bohlokwa hore barutwana ba rutwe

ka dipuo tsa bona tsa letswele ebile ke matitjhere a di buang, a nang le mangolo a ho di ruta. Hona ho tla etsa hore baithuti ba utlwisise dithuto tsa puo ya English ha bobebe ha ba tataisitswe ka ya letswele ho tloha bohatong bo qalang sekolong. O boetsa a re ke boikarabelo ba basebedisi ba puo ho nnetefatsa hore e sebediswa ka ho nepahala dibakeng tsa mmuso le tse phatlalatsa.

Ka mora hore Mme Nikiwe a fane ka puo, ditho tsa kopano di ile tsa hlahisa mathata ao bana ba kopanang le ona ha ba le dikolong nakong ya thuto. Ba ile ba kenya le kopo ya hore mmuso o tiise letsoho ho leano la ona la hore dipuo tsa letswele di sebediswe ka ho lekana le tsa matjhaba.

Ntate Mokhothu o ile a phethela letsholo ka ho leboha batsamaisi ba dikolo mme a thoholetsa basebedisi ba puo ba Freistata ka mosebetsi oo ba o etsang provenseng.